



Broj: UP-I-KSI-09-17/23
Datum: 14.04.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba zakona od strane Z. G., iz Brčkog, [REDACTED], predsjednik Upravnog odbora Razvojno-garantnog fonda Brčko distrikta Bosne i Hercegovine, na 52. sjednici održanoj dana 14.04.2023. godine, donijela je sljedeće

RJEŠENJE

1. **UTVRĐUJE SE** da je Z. G., iz Brčkog, [REDACTED], predsjednik Upravnog odbora Razvojno-garantnog fonda Brčko distrikta Bosne i Hercegovine, kao nosilac javne funkcije, postupila protivno članu 21. stav (1) točka b) Zakona o sprečavanju sukoba interesa u institucijama Brčko distrikta Bosne i Hercegovine, na način da nije izvršila dopunu Izvještaja o imovinskom stanju u roku od 30 dana od dana nastanka promjene za nepokretnu imovinu stečenu na osnovu Rješenja o nasljeđivanju od 19.05.2022. godine.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, Z. G. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine izriče opomena.

Образложење

Komisija za odlučivanje o sukobu interesa je po službenoj dužnosti Zaključkom broj: UP-I-KSI-09-17/22 od 09.03.2023. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije Z. G., predsjednik Upravnog odbora Razvojno-garantnog fonda Brčko distrikta Bosne i Hercegovine, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 21.01.2022. godine od strane nosioca javne funkcije Komisiji za odlučivanje o sukobu interesa i podataka prikupljenih od nadležnih organa i institucija o nekretninama nosioca javne funkcije,

jer nosilac javne funkcije nije izvršila podnošenje dopune Izvještaja o imovinskom stanju za svaku promjenu sadržaja Izvještaja koja se odnosi na uvećanje imovine po bilo kojem osnovu u iznosu većem od 10.000 KM u roku od 30 dana od dana nastanka promjene, odnosno nije izvršila dopunu za nekretninu označenu kao parcela broj: [REDACTED] u ukupnoj površini od 375m², koju čine dvorište u površini od 216m², stambena zgrada na sprat 1 u površini od 135 m², pomoćna prizemna zgrada 2 u površini od 24 m², sve upisane u zemljišnoknjižni uložak broj [REDACTED], sa upisanim pravom građenja na Z. G. sa dijelom od ½, nekretnina stečenih na osnovu Rješenja o nasljeđivanju od 19.05.2022. god, broj sudskog spisa: [REDACTED] broj notarskog spisa: [REDACTED], čime je postupila protivno članu 21. stav (1) točka b) Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvana da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema Zaključka o pokretanju postupka, broj: UP-I-KSI-09-17/23 od 09.03.2023. godine, zaprimljen 23.03.2023. godine, Z. G., predsjednik Upravnog odbora Razvojno-garantnog fonda Brčko distrikta Bosne i Hercegovine, kao nosilac javne funkcije je dana 03.04.2023. godine dostavila Komisiji za odlučivanje o sukobu interesa pisano Izjašnjenje u kojem, između ostalog, navodi da je neprijavljena nepokretna imovina nasljedstvo koje je naslijedila od majke zajedno sa sestrom, te da nije imala namjeru da bila šta sakrije kao i da je propust neprijavlivanja posljedica teškog emotivnog stanja prouzrokovanog gubitkom majke.

Z. G. je Odlukom o imenovanju članova Upravnog odbora Razvojno-garantnog fonda Brčko distrikta Bosne i Hercegovine broj: 01-02-6115/21 od 10.11.2021. godine imenovana za člana Upravnog odbora Razvojno-garantnog fonda Brčko distrikta Bosne i Hercegovine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisana je u Registar javnih funkcija i nosilaca javnih funkcija.

Članom 21. stav (1) točka b) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije u toku obavljanja javne funkcije podnosi dopunu Izvještaja za svaku promjenu iz člana 19. stav (2) Zakona, kao i u slučaju promjene sadržaja Izvještaja koje se odnose na uvećanje imovine po bilo kojem osnovu u iznosu većem od 10.000,00 KM, u roku od 30 (trideset) dana od dana nastanka promjene.

Primjenom navedene zakonske odredbe na utvrđeno činjenično stanje, ocjenjeno je da u konkretnom slučaju postoji povreda Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da Z. G. nije izvršila dopunu Izvještaja o imovinskom stanju u roku od 30 dana od dana nastanka promjene, odnosno nije prijavila nepokretnu imovinu koju je stekla na osnovu Rješenja o nasljeđivanju od 19.05.2022. godine, broj [REDACTED], broj notarskog spisa: [REDACTED] te je postupila protivno članu 21. stav (1) tačka b) Zakona o sprečavanju sukoba interesa u institucijama Brčko distrikta Bosne i Hercegovine.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u

konkretnom slučaju, a pri tome vodeći računa o težini i posljedicama povrede Zakona, te činjenici da je Z. G., nosilac javne funkcije, predala Izvještaj o imovinskom stanju za 2022. godinu u kojem je upisala podatke o predmetnoj nepokretnoj imovini, te se prema njenom postupanju i odgovornosti, ličnosti nosioca javne funkcije, odnosu imenovane prema kršenju odredaba Zakona kao i opredijeljenosti imenovane da postupi u skladu sa Zakonom, te otkloni razloge koji su doveli do kršenja odredaba Zakona kao i prouzrokovanoj posljedici, radi o očito lakšem obliku kršenja odredaba Zakona, koje nisu nanijele štetu integritetu javne funkcije koju Z. G. obavlja, Komisija je stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik Komisije
za odlučivanje o sukobu interesa

Admira Mujić, dipl. pravnik

Dostavljeno:

1. Z. G., [REDACTED], Brčko,
2. Internet stranici Komisije,
3. Evidenciji i
4. Arhivi.